

Caro famiho dóu majourau Zefir Bosc,  
Car Counfraire e felibre,  
Midamo, Messiés,

Un an après sa despartido, si dos famiho, sa parentèlo e la famiho felibrenco acampado, rëndon au majourau Zefir Bosc l'oumenage fervènt que lis endevenènço, l'an passa, avien pas permés.

[Ai, en coumençant, de vous dire li regrèt de la majouralo Peireto Berengier qu'a pas pouescu veni e qu'aurié bravamen ama èstre demié nautre. Vous pode afourti qu'es proun lagnado. Me diguè au telefone « siéu talamen tristo, tant de cop siéu vengudo à Espeirac ».]

Es dounc pas sèns bate-cor qu'emé devé e respèt aduse vuei moun testimòni. Es pamens mau eisa d'apoundre encaro de mot i drùdi paraulo qu'avèn entendu e que depinton à la belesso la vido, li sentimen, lou pres-fa e l'astrado dóu regreta majourau Zefir Bosc.

Sa famiho, sis ami rouergas an vougu aquesto piouso ceremounié dins la founso remembranço de ço qu'èro lou majourau Bosc, de ço qu'a fa, de ço qu'a trasmés. Sian aquí pèr se souveni d'èu, se souveni de l'ome probe de l'amo sensible mai ferme dins si counvicioun, de l'ome de refleissioun, de l'ome de memòri, de l'ome de sabé, de l'ome asciença qu'amavo mai que tout sa lengo meiralò, lengo que manejà d'un biais naturau e requist e qu'aparavo fermamen.

Lou 30 de novèmbre de l'an passa, aviéu saluda l'erudicioun, l'obro precioso e granado de l'escrivan, dóu pouèto, de l'istourian, que fuguè Zefir Bosc ; merite literari que lou Felibrige recouneissié tre 1977 en i'atribuïssènt lou titre rare de mèstre en Gai Sabé.

Vole quicha vuei sus l'eiretage que laisso lou majourau Zefir Bosc, voudriéu lausa soun inteligènci e sa clar-vesènço pèr que noun s'arrouinèsse la mount-joio de soun sabé ; valènt-à-dire qu'a sachu, Diéu merci, coucha sus lou papié si couneissènço, si recerco, tóuti lis entre-signe qu'a pacientamen amoulouna dins un fube de publicacioun que demoron aro uno memòri precioso, un testimòni escri de soun païs e d'usanço desenant perdudo. De sis endré dóu Fèl e d'Entraigo fin qu'is encountrado de la Viadèno, dóu Carladés, d'Aubrac e dóu Rouergue tout entié, n'a sachu retipa la vido e l'èime. Di vignarés de soun encountrado e de la ribiero d'Olt n'a sachu retraire lis usage, li mestié, li pratico.

Aquelo culido d'enfourmacion, aquelo obro etnografico, mai tambèn la sabour e lou prefouns de sa pouèsio faguèron que soun noum passè li raro dóu Rouergue e s'avanquiguè fin qu'à l'ensèn di païs d'o.

Avèn de pesca la determinacion, la voulounta e la fidelita dins l'eisèmple preclar dóu majourau Zefir Bosc. Lou seguiren dins la draio d'umanisme e de trasmessioun qu'a fatura sapientamen. Lou faren segui à tóuti aquéli jóuini felibre que demandon qu'à saupre, que demandon qu'à se refourti dins lis ate e la pensado di davancié.

Gardaran uno vivo recouneissènço, li felibre-mantenèire en generau e li felibre-majourau en particulié que ié faguèron tant car e qu'en sesiho dóu Counsistòri escoutavon si paraulo

em'atencioun quouro fasié entèndre soun oupinioun emé proun de judice o qu'èro soucitous di principe e de l'equita.

Pasta d'un sabé naturau e de la muso di letro d'o, lou majourau Zefir Bosc fuguè un passaire di valour nostro entre l'eminènt majourau Jousè Vaylet e d'ùni jòuini voucacioun qu'a apetega à la Causo felibrenco.

Counsciènt dóu necite qu'aqueste liame intergeneraciounau, mai peréu atentiéu à la vido e à l'anamen dóu Felibrige, lou majourau Zefir Bosc faguè provo d'uno devoucioun sènso fali, d'uno sagesso remirablo, d'uno fe pleniero.

Vaqui perqué, caro famiho Bosc, cars ami, siéu vengu de proun liuen, saluda emé vautre la memòri d'aquéu pouèto noble, franc e leiau, qu'a servi tant belamen soun país e nosto istitucioun, vaqui perqué siéu vengu adurre à Espeirac e sus sa toumbo lis óumage respetous de tout lou Felibrige.

Jaque Mouttet  
Capoulié dóu Felibrige